

# Kongré krab

Sété an tan krab té lé fè élèksion

Yo fè an gran sanblé pa bô la Krabesterre...

Zagaya déklaré ki dé mal krab pa ka viv adan an menm trou

Sirik jòn afirmé ki tout krab konnèt tou yo

Touloulou rouj asiré ki zo sirik pa ka fè soup

Koutja di ki tout krab ka mô an marinad

Sémafòt prétann ki sé bon tjè krab ki ba'y do an fè

Krab-mal-zorèy asiré ki fo toujou ou ba krab bien manjé pou ou manjé'y apré

Krab-blan konstaté ki maya té ba kayali mal-vant, magré sa kayali ka manjé'y

Maya prédié : « O nom dé krab-farsi, dé zékal-krab, é dé matoutou-krab, Amenn ! »

Papa-krab lévé faché : « Bann malkrab-kouyon, sa bout ! arété vo krabio'nri !

Si nou lé vini a bout, dé krabis, dé krabié, dé krabiolè, é ot krabiolog,

Fo nou arété fè krabionad, (kriyonnad krab), sinon nou tjou-tjout !

Sé kaka krab ki an tèt zot alow?!

Fo réfléchi !!! sinon, tout krab-la kay mô an bari-ya ! »

**(Men... krab pa ni tèt... I pé pa réfléchi!)**

Mantou réponn : « Jistiman, fèmen djol zot ! Rété an tou zot!

Sé trop palé ki fè krab pa ni tèt... èk ka fèy fini an fétou lé lendi Pak»

Gro-modan, ki pa boug ka fè krab, rigolé : « érèz-di-bonè ki krab pa ni latjé !

Sinon yo té kay kon sèpan ka modé latjé yo ! »

Sokan Gwadoup di an tjèy: « Hon ! biten lasa sé an vré pannié a krab !

An-an! trop kankan ! an pa an sa menm!

An ka pwan kan an mwen, an foukan misié Likan! »

Dépi jou tala pani krab ki mè...

Ni mè ki krab dayè !